

ԷԶԵՐ ՀԱՅԱՍՏԱՆԻ ՊՐՈՅԵՍԻՈՆԱԼ-ՏՆՆԵԻԿԱԿԱՆ ԿՐԹՈՒԹՅԱՆ
ԶԱՐԳԱՑՄԱՆ ՊԱՏՄՈՒԹՅՈՒՆԻՑ

Վ. Ա. ԳՐԻԳՈՐՅԱՆ

Հոկտեմբերյան սոցիալիստական մեծ հեղափոխությունից հետո մեր երկրի առջև ամբողջ սրությամբ դրվեց ժողովրդական տնտեսության վերականգնման և սոցիալիստական վերակառուցման հարցը: Անհրաժեշտ էր գործի գցել երկրում հղած արդյունաբերական ձեռնարկությունները, ստեղծել նորերը:

Սակայն այդ հարցի հաջող լուծումը մեծ մասամբ կախված էր որակյալ մասնագետ կադրերի առկայությունից, նրանց պատրաստման տեմպերից: Ահա թե ինչու Վ. Ի. Լենինը հեղափոխությունից անմիջապես հետո, ժողովրդական տնտեսության զարգացմանը զուգընթաց, առաջ է քաշում բանվորական կադրերի պրոֆեսիոնալ-տեխնիկական ուսուցման հարցը: Պրոֆեսիոնալ կրթությամբ կադրերի պատրաստման հրատապ պահանջը բխում էր սոցիալիստական շինարարության խնդիրներից: Վ. Ի. Լենինը մատնանշում էր, որ սոցիալիզմի արագ կառուցման կարևոր նախապայմաններից մեկը ժողովրդական տնտեսության բոլոր ճյուղերի համար որակյալ կադրերի առկայությունն է: «Սովետական իշխանության հերթական խնդիրները» աշխատության մեջ Վ. Ի. Լենինը նշում էր, որ «առանց գիտությունների, տեխնիկայի, փորձի, զանազան ճյուղերի մասնագետների ղեկավարության, անկարելի է սոցիալիզմին անցնել, որովհետև սոցիալիզմը պահանջում է գիտակից և մասսայական առաջընթաց շարժում դեպի աշխատանքի ամենաբարձր արտադրողականություն»¹:

1920 թ. հուլիսին հրապարակվեց լենինյան դեկրետը՝ «Աշխատավորների պրոֆեսիոնալ-տեխնիկական պարտադիր ուսուցման մասին»: Դեկրետում նշված էր, որ 18—40 տարեկան հասակի բոլոր բանվորները պետք է անցնեն պրոֆեսիոնալ-տեխնիկական ուսուցման դասընթացներ: Այդ գործը պետք է այնպես կազմակերպել, նշել է Վ. Ի. Լենինը, որ ուսումը կապվի արտադրողական աշխատանքի հետ, աճող սերունդը դաստիարակվի կոմունիստական բարոյականության ոգով²: Լենինյան այդ գաղափարը դարձավ այն հիմնաքարը, որի վրա մեր երկրում հետագայում կառուցվեց պրոֆեսիոնալ-տեխնիկական կրթության ամբողջ սիստեմը:

1920 թ. Սովետական Ռուսաստանում ստեղծվեցին առաջին ֆաբրիկա-գործարանային աշակերտության դպրոցները (ՓՅՄ), որտեղ ապագա երիտասարդ բանվորները ձեռք էին բերելու պրոֆեսիոնալ և տեխնիկական կրթություն: Այդ դպրոցներում ուսուցումը բարդ մասնագիտությունների գծով տևում էր 3—4 տարի, իսկ մասսայական մասնագիտությունների գծով՝ 2—3 տարի:

¹ Վ. Ի. Լենին, Երկեր, հ. 27, էջ 295:

² Տե՛ս նույն տեղում, հ. 31, էջ 353:

Դպրոցները կազմակերպվում էին ձեռնարկություններին կից և սովորողները համարվում էին տվյալ ձեռնարկության աշխատողներ:

Սակայն այդ դպրոցները կարող էին միայն մասնակիորեն ռավարարել զարգացող արդյունաբերության պահանջները: Ուստի, դրանցից բացի, 20-ական թվականներին ստեղծվեցին դպրոց-արհեստանոցներ, տարբեր ժամկետներով դասընթացներ, որոնք հնարավորություն տվեցին պատրաստելու մեծ թվով որակյալ բանվորներ: Այդ միջոցառումը մեծ դեր խաղաց սոցիալիստական շինարարության տարիներին: Սակայն զարգացող սոցիալիստական արդյունաբերությանն անհրաժեշտ էին ավելի շատ որակյալ բանվորներ և մասնագետներ:

Ելնելով դրանից, կուսակցությունն ու սովետական կառավարությունը դրեցին նոր բանվորական կադրերի մասսայական պատրաստման խնդիրը: Ինչպես մյուս հանրապետություններում, այնպես էլ Հայաստանում այդ ուղղությամբ որոշակի քայլեր կատարվեցին: Արդեն 1924 թ. հանրապետությունում լուսժողովատնի ենթակա տեխնիկումներում, դպրոց-արհեստանոցներում, կարճատև դասընթացներում սովորողների թիվը հասավ 1113-ի³, 1925 թ. լեհինականի տեքստիլ կոմբինատի բազայի վրա ստեղծվեց առաջին ֆաբրիկագործարանային աշակերտության դպրոցը⁴:

Չնայած դրան, որակյալ բանվորների և ինժեներա-տեխնիկական կադրերի պատրաստման հարցը Հայաստանի համար մնում էր որպես կարևորագույն խնդիրներից մեկը: Այդ է վկայում Համահայաստանյան ուսուցչական առաջին համագումարը, որը լուսժողով Ա. Մուսվանի ղեկուցման առթիվ ընդունած բանաձևում արձանագրել է. «Մեր տնտեսության երկու հիմնական ճյուղերը՝ արդյունաբերությունը և գյուղատնտեսությունը բարձրացնելու համար... պահանջվում է որակյալ բանվորների մեծ քանակ, Հայաստանի գյուղի և քաղաքի տնտեսության հետագա արագ զարգացումը պահանջում է գյուղատնտեսական և պրոֆեսիոնալ կրթության արագ կազմակերպում»⁵:

1926 թ. դեկտեմբերին Հայաստանի կոմկուսի III ընդլայնված պլենումը նորից անդրադարձավ որակյալ բանվորական կադրերի պատրաստման հարցին և ընդգծեց ռորակյալ բանվորների և տեխնիկական ղեկավարող կադրերի պատրաստման, ինչպես նաև գոյություն ունեցող կադրերի վերապատրաստման հրամայական անհրաժեշտությունը: Երկու տարի անց՝ 1928 թ. Հայաստանի յոթ գավառային կենտրոններում բացվեցին կար ու ձևի պրոֆեսիոնալ-տեխնիկական դպրոցներ, կարճատև դասընթացներում պատրաստվում էին հաշվապահներ, էլեկտրատեխնիկներ, հեռագրիչներ, վարորդներ, կոոպերատիվ աշխատողներ և այլն: Երևանում գործում էր նաև կենտրոնական դպրոց-արհեստանոցը, որտեղ սովորում էին 216 անապաստան երեխաներ⁶:

Նայն տարածում գտավ նաև բանվորների վերապատրաստման անմիջականորեն արտադրության մեջ՝ անհատական և բրիգադային ուսուցման մեթոդով: Պրոֆեսիոնալ-տեխնիկական կրթության այդ ձևը որոշակիորեն նպաս-

³ Մի-ի հայկ. մասնաճյուղի արխիվ, ֆ. 148, ց. 1, գ. 282, թ. 89:

⁴ Տե՛ս Ս. Ա. Մ Ի ք ա յ ե լ յ ա ն, Պրոֆեսիոնալ-տեխնիկական կրթությունը Սովետական Հայաստանում, Երևան, 1960, էջ 7:

⁵ Մոտրհրգային Հայաստան, 10. I. 1925:

⁶ Տե՛ս Восстановление народного хозяйства Арм. ССР, изд. АН Арм. ССР, Ереван, 1958, стр. 481.

տեղ ակադեմիայի կազմակերպչական գործի բարելավմանը: Արտադրության մեջ ավելացավ երիտասարդ բանվորների քանակը և, ինչպես նշվեց կոմերիտմիության համահայաստանյան V համագումարի թեզիսներում, հանրապետության արդյունաբերության մեջ զբաղված բանվորության կազմում երիտասարդ բանվորների թիվը 21,3 տոկոսից հասավ 34 տոկոսի⁷:

Երիտասարդության պրոֆեսիոնալ-տեխնիկական կրթության բարելավմանը մեծ չափով նպաստեց ՀամԿ(բ)Կ 1928 թ. հուլիսյան պլենումը, որն արձանագրեց՝ «նոր մասնագետների պատրաստումը դառնում է ամբողջ կուսակցության կարևորագույն խնդիրը»⁸:

Կենսագործելով կուսակցության դիրեկտիվները 1929—1930 թթ. Հայաստանում լուրջ ուղադրություն է դարձվում բանվորական կադրերի պատրաստման գործին. այդ տարիներին կազմակերպվում են ֆաբրիկա-գործարանային աշակերտության դպրոցը (Լենինականի տեքստիլ կոմբինատի բազայի վրա), մեխանիկական ֆաբգործուսը (Լենինականի երկաթգծին կից) և հանքագործական ֆաբրիկա-գործարանային աշակերտության դպրոցը (Ալավերդու պղնձահանքերին կից)⁹:

Ինչպես Սովետական Միության բոլոր հանրապետությունների, այնպես էլ Սովետական Հայաստանի համար առաջին հնգամյակի տարիները ինդուստրիայի զարգացման տեսանկյունից շրջադարձային նշանակություն ունեցան: Հանրապետության համար առաջին հնգամյակի հիմնական խնդիրներն էին՝ «Հայաստանում հայտնաբերել երկրի բնական հարստությունները, մեր նահապետական գյուղատնտեսական երկիրը փոխադրել արդյունաբերական զարգացման ուղիների վրա... Հանրապետությունում զարկ տալ մասսաների կուլտուրական վերելքին, աճող ու բարձրացող ժողովրդական տնտեսությունը ապահովել որակավոր, սեփական կադրերով»¹⁰: Հանրապետության ժողովրդական տնտեսության մեջ առաջին հնգամյակի տարիներին ներդրվեց 319,3 միլիոն ռուբլի, պլանով նախատեսված 276,8 միլիոնի դիմաց¹¹: Այդ ընթացքում հանրապետությունում գործարկվեցին 22 նոր արդյունաբերական ձեռնարկություն և 6 հիդրոէլեկտրակայան:

ՀամԿ(բ)Կ Կենտրոնական կոմիտեի 1929 թ. նոյեմբերյան պլենումը քննության առնելով տեխնիկական կադրերի պատրաստման վերաբերյալ հուլիսյան պլենումի որոշման կատարման ընթացքը, միջոցներ ձեռնարկեց տեխնիկական ու բանվորական կադրերի պատրաստման գործի հետագա բարելավման ուղղությամբ: Այդ կապակցությամբ պրոֆեսիոնալ-տեխնիկական ուսուցման ու բանվորական որակյալ կադրերի պատրաստման աշխատանքների կազմակերպումն ու ղեկավարությունը լուսժողովատենների տնօրինությունից հանձնվեցին արդյունաբերական գերատեսչություններին, որով որոշակիորեն ամրապնդվեց դպրոցների, դասընթացների նյութական ու տնտեսական բազան:

⁷ ՄԼԻ-ի հայկ. մասնաճյուղի արխիվ, ֆ. 48, ց. 51, գ. 858, թ. 11—12:

⁸ ՄՄԿԿ-ն համագումարների, կոնֆերենցիաների և կենտկոմի պլենումների րանաձևերում և որոշումներում, Երևան, 1955, մաս 2, էջ 657:

⁹ Տե՛ս ՄԼԻ-ի հայկ. մասնաճյուղի արխիվ, ֆ. 48, ց. 62, գ. 1086, թ. 9, 32:

¹⁰ Ա. Խ ա ն չ յ ա ն, Հնգամյակի հաղթանակը և Խորհրդային Հայաստանը, Երևան, 1933, էջ 15:

¹¹ Հայ ժողովրդի պատմություն, Երևան, «Լույս», 1969, էջ 321:

Որակյալ կադրերի պատրաստմանը մեծ դարկ տրվեց նաև մեր հանրապետությունում, զգալիորեն ավելացավ ուսումնական հաստատությունների և նրանցում սովորողների թիվը: Առաջին հնգամյակի տարիներին Հայաստանում գործում էին 9 ինստիտուտ, 10 բանֆակ, 31 պրոֆեսիոնալ-տեխնիկական դըպրոց, գործարանային վերաորակավորման կարճատև դասընթացներ ու մեծ թվով տեխնիկումներ¹²: Կարճ ժամանակամիջոցում հանրապետության բուհերը և միջնակարգ մասնագիտական ուսումնական հաստատությունները ժողովրդական տնտեսությանը տվեցին ավելի քան 9000 մասնագետներ¹³:

1928—1932 թթ. Հայաստանում արագ թափով զարգացավ արդյունաբերությունը: Շարք մտան Կիրովականի Ալ. Մյասնիկյանի անվան քիմիական կոմբինատը, Արարատի ցեմենտի գործարանը, Երևանի ծխախոտի ֆաբրիկան, Ղափանի պղնձի հարստացուցիչ ֆաբրիկան, Սարգարապատի բամբակազտիչ գործարանը և այլն: Արդյունաբերության զարգացումը հնարավորություն տվեց հանրապետության խոշոր ձեռնարկություններում կենտրոնացնելու մասնագետներին ու որակյալ կադրերին:

Այսպես, Հայրենական պատերազմի նախօրյակին Երևանի Ս. Մ. Կիրովի անվան քիմիական կոմբինատում աշխատում էին 1600 մասնագետներ ու որակյալ բանվորներ, Զանգեզուրի պղնձահանքային կոմբինատում՝ մոտ 1000, Ալավերդու պղնձաձուլական գործարանում՝ 500, Լենինականի տեքստիլ կոմբինատում՝ 1500: Ավելի քան 2000 մասնագետներ և որակյալ բանվորներ աշխատում էին հանրապետության թեթև արդյունաբերության ձեռնարկություններում¹⁴:

Սակայն հանրապետության ժողովրդական տնտեսության հետագա վերելքը նոր, ավելի բարձր պահանջներ էր ներկայացնում բանվորական կադրերի պատրաստման ուղղությամբ: Մասնավորապես ծանր արդյունաբերության զարգացումը, արդյունաբերական ձեռնարկությունների հագեցումը ժամանակակից մեքենաներով ու սարքավորումներով, պահանջում էին բարձր որակավորում ունեցող բանվորական կադրեր: «Այժմ, — նշել է Ն. Կ. Կրուպսկայան, — այս կամ այն պրոֆեսիայի համար պատրաստվողից պահանջվում է արդեն ոչ թե նեղ տեխնիկական վարժություն, այլ դազգահի հետ վարվելու, իր դազգահի աշխատանքն առավել արտադրողաբար կազմակերպելու ունակություն, ընդհանուր ծանոթություն ամբողջ արտադրության հետ»¹⁵:

Հանրապետությունում սոցիալիզմի կառուցման տարիներին բանվոր դասակարգի համալրումը կատարվում էր գյուղի հաշվին՝ կազմակերպված հավաքադրման միջոցով: Սակայն արդյունաբերական ձեռնարկությունների ստեղծումը՝ նոր տեխնիկայի բազայի հիման վրա, պահանջում էր ավելի ու ավելի շատ որակյալ բանվորական կադրեր, մինչդեռ գյուղից հավաքագրվածները, պայմանագրային ժամկետը լրանալուց հետո, նորից վերադառնում էին գյուղ: Իրենց չարաբարացրին նաև ֆաբրիկա-գործարանային աշակերտության դպրոցները. եթե 1931—32 ուստարում ՍՍՀՄ-ում կար ֆաբգործուի 3970 դպրոց՝ 970000 աշակերտներով, ապա 1938—1939 ուստարում ընդամենը մնա-

¹² Փ. Ի. Ծեղոյան, Հայաստանը ինդուստրացման ուղիով, Երևան, 1967, էջ 55:

¹³ Հայ ժողովրդի պատմություն, Երևան, «Լույս», 1969, էջ 325:

¹⁴ Ст'я СССР. строительство в Арм. ССР (1920—1940 гг.), Ереван, 1940, стр. 115.

¹⁵ Ն. Կ. Կրուպսկայա, Երիտասարդության մասին, Երևան, 1947, էջ 155:

ցել էր 1535 դպրոց՝ 242000 աշակերտով¹⁶։ Եվ դա այն դեպքում, երբ ՍՍՀՄ-ի արդյունաբերությանը այդ նույն ժամանակաշրջանում չէր բավականացնում մոտավորապես 1,3 մլն. բանվոր¹⁷։

Ֆարգործուսի դպրոցները, որոնք երկրի ինդուստրացման տարիներին մեծ դեր էին կատարել որակյալ բանվորական կադրերի պատրաստման գործում, արդեն չէին համապատասխանում նոր պահանջներին։ Երկրի արդյունաբերության, շինարարության, տրանսպորտի և ժողովրդական տնտեսության մեացած ճյուղերի զարգացումը հրամայաբար պահանջում էր լուրջ փոփոխություններ մտցնել երիտասարդ որակյալ բանվորական կադրերի պատրաստման գործում։

ՍՍՀՄ Գերագույն սովետը 1940 թ. հոկտեմբերի 2-ին որոշում ընդունեց պետական աշխատանքային ռեզերվներ ստեղծելու մասին։ Նրանում ասված էր. «Մեր արդյունաբերությունը ավելի ընդարձակելու խնդիրը հրամայաբար պահանջում է բանվորական ուժի մշտական ներհոսում դեպի հանքահորերը, տրանսպորտը, ֆաբրիկաներն ու գործարանները։ Առանց բանվոր դասակարգի կազմի անընդհատ համալրելու, հնարավոր չէ մեր արդյունաբերության հաջող պարգացումը։ Այդ պայմաններում պետության առջև խնդիր է դրվում՝ կազմակերպված ձևով նոր բանվորներ պատրաստել քաղաքային ու կոլտնտեսային երիտասարդությունից և արդյունաբերության համար անհրաժեշտ աշխատանքային ռեզերվներ ստեղծել»¹⁸։

Աշխատանքային ռեզերվների ստեղծումը դարձավ մեր երկրի բանվոր դասակարգի շարքերը պլանաչափ կերպով համալրելու հզոր աղբյուր։ Պետական աշխատանքային ռեզերվների ստեղծումը նոր էջ էր բացում պրոֆեսիոնալ-տեխնիկական կրթության պատմության մեջ։

Բանվոր դասակարգի համալրման նոր սիստեմի առանձնահատկություններն էին.

1. Արհեստագործական ուսումնարանների և ֆարգործուսի դպրոցների ամբողջ սիստեմը կենտրոնացվում էր ՍՍՀՄ Մինիստրների սովետին կից աշխատանքային ռեզերվների գլխավոր վարչությունում. մինչդեռ ֆարգործուսի դպրոցները չունեին միասնական ղեկավար օրգան և ենթարկվում էին գերատեսչություններին ու ձեռնարկություններին։

2. Այդ ուսումնական հաստատությունները համարվեցին պետական աշխատանքային ռեզերվներ, որոնց հաշվին արդյունաբերությունը, տրանսպորտը և շինարարությունը պետք է համալրվեին պահանջվող քանակի որակյալ բանվորական կադրերով։

3. Արհեստագործական ուսումնարանները և ֆարգործուսի դպրոցները կոմպլեկտավորվելու էին կազմակերպված ձևով՝ այդ ուսումնական հաստատություններում սովորելու համար հավաքագրելով քաղաքի և գյուղի երիտասարդությունը (նախկինում կոմպլեկտավորումը կատարվում էր ազատ ընտրության հիմունքներով)։

¹⁶ А. С. Веселов, Профессионально-техническое образование в СССР. Очерки по истории сред. и низшего профтехобразования, М., 1961, стр. 237.

¹⁷ Н. Н. Забелин, Г. Н. Зеленский, Ф. И. Котов, В. Т. Рощин, Планирование подготовки и распределение рабочих кадров в СССР, М., 1960, стр. 16.

¹⁸ «Սովետական Հայաստան», 4. X. 1940։

4. Այդ ուսումնական հաստատությունների սովորողների բոլոր ծախսերը պետությունն ամբողջապես վերցնում էր իր վրա:

5. Աշխատանքային ռեզերվների ուսումնական հաստատությունները մեր երկրի երիտասարդության առջև բացեցին լայն հնարավորություններ: Ուսումնարաններում և դպրոցներում պայմաններ էին ստեղծվում սովորողների անհատական ընդունակությունների զարգացման համար:

6. Ի տարբերություն ֆաբրիկադործարանային աշակերտության դպրոցների, որոնց շրջանավարտները տեղավորվում էին աշխատանքի միայն այն գերատեսչություններում, որոնց բազայի վրա ստեղծված էր դպրոցը, արհեստագործական ուսումնարանների և ֆաբդործուսի դպրոցների շրջանավարտները երեք տարի պարտադիր կարգով գտնվում էին պետության տրամադրության տակ, որը հնարավորություն ուներ նրանց օգտագործել ըստ անհրաժեշտության:

7. Վերջապես, այդ ուսումնական հաստատություններում երիտասարդությունը, տիրապետելով հանրակրթական և ընդհանուր տեխնիկական առարկաներին, անցնում էր քաղաքական դաստիարակության որոշակի դպրոց. նրա մեջ ձևավորվում էին կոմունիստական գիտակցության, կուլտուրական վերաբերմունքի, կոլեկտիվիզմի և ընկերական փոխօգնության տարրեր:

Այսպիսով, պետական աշխատանքային ռեզերվների սիստեմի ստեղծումը հնարավորություն տվեց կենսագործելու բանվոր դասակարգի կուլտուր-տեխնիկական զարգացման արագ վերելքը: Այն մեր պետության տնտեսական քաղաքականության արտացոլումն էր և նպաստեց սոցիալիզմի հիմնական տրնտեսական օրենքի կենսագործմանը, ժողովրդական տնտեսության համաշափ զարգացմանը: Հնարավորություն ստեղծեց հարաբերակցություն սահմանելու ժողովրդական տնտեսության զարգացման և որակյալ բանվորական կադրերի վերադաստիարակման, ինչպես նաև ժողովրդական տնտեսության առանձին ճյուղերի միջև բանվորական ուժի ճիշտ և համաշափ վերաբաշխում կատարելու համար:

ՍՍՀՄ Ժողկոմխորհի 1940 թ. հոկտեմբերի 2-ի որոշման համաձայն, Հայաստանի Ժողկոմխորհը նույն թվականի հոկտեմբերի 19-ին կազմակերպեց Հայկական ՍՍՀ աշխատանքային ռեզերվների վարչություն, որի նպատակն էր հանրապետության զարգացող արդյունաբերությունը, շինարարությունը և տրանսպորտն ապահովել որակյալ բանվորական կադրերով: Այդ որոշմամբ նախատեսվում է 1940 թ. նոյեմբերի 10—25-ը ընկած ժամանակաշրջանում հանրապետության աշխատանքային ռեզերվների ուսումնական հաստատություններում սովորելու համար քաղաքային և գյուղական երիտասարդությունից հավաքագրել 1000 մարդ՝ այդ թվում արհեստագործական ուսումնարաններում ընդգրկել 14—15 տարեկան անչափահասներից 600 հոգի և ֆաբդործուսի դպրոցներում՝ 16—17 տարեկաններից 400 հոգի¹⁹:

Հանրապետության երիտասարդությունը կառավարության այս որոշումը չերմորեն ընդունեց: Հայաստանի կուսակցական, կոմերիտական կազմակերպությունները և սովետական օրգանները լայն բացատրական աշխատանք կազմակերպեցին երիտասարդության շրջանում՝ նրանց արհեստագործական և ֆաբդործուսի դպրոցներում ընդգրկելու համար: Արդյունքը եղավ այն, որ

¹⁹ Նույն տեղում, 20. X. 1940:

նոր բացվող ուսումնարաններում և ֆաբգործուսի դպրոցներում նախատեսված 1000 տեղի դիմաց ստացվեց ավելի քան 3000 դիմում²⁰։

Հանրապետության կառավարության որոշմամբ 1940 թ. դեկտեմբերին նրանում կազմակերպվեց երկու արհեստագործական ուսումնարան՝ յուրաքանչյուրը 300-ական սովորողներով՝ քիմիական և մետաղամշակման արդյունաբերության համար²¹։ Բացվեցին նաև երեք ֆաբրիկագործարանային ուսուցման դպրոցներ, և աշխատանքային ռեզերվների ուսումնական հաստատությունների ցանցն աստիճանաբար ընդարձակվեց։

Հիկ Կենտկոմի և Հայկական ՍՍՀ Ժողկոմխորհի 1941 թ. մայիսի 9-ի որոշմամբ հանրապետության արհեստագործական ուսումնարաններում և ֆաբգործուսի դպրոցներում հավաքագրվում են 1600 պատանիներ ու աղջիկներ։ Ղափանի պղնձահանքերի կոմբինատին կից ֆաբրիկագործարանային աշակերտության դպրոցը վերակազմվում է ֆաբրիկագործարանային ուսուցման դպրոցի, իսկ Լենինականի ֆաբրիկա-գործարանային աշակերտության դպրոցը վերածվում է երկաթուղային արհեստագործական ուսումնարանի²²։

Մեր հայրենիքի վրա ֆաշիստական Գերմանիայի ուխտագրուծ հարձակումից հետո, երբ մշակվեցին երկրի էկոնոմիկական պատերազմի պայմաններին համապատասխան կազմակերպելու միջոցառումներ, փոխվեցին նաև արհեստագործական ուսումնարանների և ֆաբգործուսի դպրոցների պրոֆիլն ու աշխատանքի բովանդակությունը։ Կրճատվեց ուսման տեղությունը, ամբողջ ուշադրությունը կենտրոնացվեց պետական պլանների կատարման և ռազմաճակատի կարիքները հոգալու վրա։ Պատերազմական պայմաններում անհրաժեշտ էր ընդարձակել գործող արհեստագործական ուսումնարանների և ֆաբգործուսի դպրոցների ցանցը և ավելացնել նրանցում սովորողների թիվը։

Հիկ Կենտկոմի բյուրոյի 1942 թ. հունվարի որոշմամբ հանձնարարվեց հանրապետության աշխատանքային ռեզերվների վարչությանը՝ հավաքագրման կարգով ֆաբրիկագործարանային դպրոցներում ընդգրկել 2000 պատանիներ ու աղջիկներ, ֆաբգործուսի № 5 դպրոցի բազայի վրա կազմակերպել նոր ֆաբգործուսի դպրոց՝ 640 սովորողներով, անհրաժեշտ օգնություն ցույց տալ ուսումնական հաստատություններին, դրանք ապահովել անհրաժեշտ քանակությամբ սարքավորումներով ու այլ միջոցներով²³։ Կարճ ժամանակում զգալիորեն բարելավվեց նրանց նյութական բազան։ 1944 թ. աշխատանքային ռեզերվների ուսումնական հաստատությունների համար բյուջեով նախատեսված ծախսերը կազմում էին արհեստագործական ուսումնարանների գծով՝ 9 մլրդ. 446 հազար ռուբլի և ֆաբգործուսի դպրոցների գծով՝ 3 մլն. 715 հազար ռուբլի²⁴։ 1944 թ. հանրապետությունում արհեստագործական ուսումնարանների և ֆաբգործուսի դպրոցների թիվը ավելացավ 5-ով²⁵։

Պատերազմական տարիներին Հայաստանի աշխատանքային ռեզերվների ուսումնական հաստատությունները հսկայական աշխատանք կատարեցին ար-

20 «Ավանգարդ», 3. XII. 1940։

21 ՄԻ-ի հայկ. մասնաճյուղի արխիվ, ֆ. 1, ց. 29, գ. 244, թ. 75։

22 Նույն տեղում, ց. 30, դ. 241, թ. 9։

23 Տե՛ս նույն տեղում, ց. 31, գ. 271, թ. 7։

24 Տե՛ս ՀՀՍՇՊԿԱ, ֆ. 591, ց. 2, գ. 63, թ. 64։

25 Տե՛ս ՄԻ-ի հայկ. մասնաճյուղի արխիվ, ֆ. 1, ց. 34, գ. 10, թ. 27։

տաղրական ձեռնարկությունները որակյալ կադրերով ապահովելու ուղղությամբ և իրենց լուսման ներդրեցին թշնամուն ջախջախելու գործում:

Ինչպես նշվեց ՀԿԿ Կենտկոմի 1945 թ. սեպտեմբերյան պլենումում, պատերազմի տարիներին հանրապետության արհեստագործական ուսումնարաններն ու ֆաբգործուսի դպրոցները պատրաստել և արտադրական ձեռնարկություններին են հանձնել 9589 երիտասարդ որակյալ բանվորներ: Այդ ուսումնական հաստատությունների սովորողները ռազմաճակատի կարիքների համար պատրաստել են 500000 ուրլու արտադրանք²⁶:

Սոցիալիստական շինարարության տարիներին, Հայաստանի ժողովրդական տնտեսության պահանջներին համապատասխան, զարգանում է աշխատանքային ռեզերվների ուսումնական հաստատությունների ցանցը: Հանրապետության էկոնոմիկայի զարգացումը և տեխնիկական առաջադիմությունը անհրաժեշտություն դարձրին ստեղծելու մի շարք ֆաբրիկագործարանային ուսուցման դպրոցներ և արհեստագործական ուսումնարաններ, աճեց նրանցում սովորողների քանակը և բարձրացավ նրանց հանրակրթական մակարդակը: Այդ բոլորը խոշոր նշանակություն ունեցան ինչպես բանվորական որակյալ կադրերի պատրաստման բուն պրոցեսի բարելավման, այնպես էլ բանվոր դասակարգի ձևավորման, հետևաբար և Հայաստանի էկոնոմիկայի և կուլտուրայի զարգացման համար:

СТРАНИЦЫ ИЗ ИСТОРИИ РАЗВИТИЯ СИСТЕМЫ ПРОФТЕХОБРАЗОВАНИЯ АРМЯНСКОЙ ССР

В. А. ГРИГОРЯН

Р е з ю м е

Наиболее целесообразной формой подготовки квалифицированных кадров были школы фабрично-заводского ученичества. Первая такая школа была открыта в 1925 г. на базе Ленинанканского текстильного комбината. В дальнейшем такие школы были созданы в Ереване, Алаверди, Кафане и в других местах.

Сеть учебных заведений подобного рода в Армении начала развиваться после Указа Президиума Верховного Совета СССР от 2 октября 1940 г. в связи с созданием системы трудовых резервов в нашей стране.

За короткий срок в Армении один за другим создаются школы ФЗО и ремесленные училища. Перед войной их в республике насчитывалось уже 11, где обучались около 3355 человек. В этих учебных заведениях обучались и направлялись на производство тысячи юношей и девушек, заменившие тех кадровых рабочих, которые отбыли на фронт. Как отмечалось на сентябрьском пленуме ЦК КП Армении 1945 г., учебные заведения в системе трудовых резервов в годы войны подготовили и передали народному хозяйству республики 9589 квалифицированных рабочих.